

Tha eòin a' togail neadan anns am bi iad ag àrach an àl. Aon uair 's a tha an nead deiseil tha an t-eun boireann a' breith uighean innte. Mar as tric tha an t-eun fireann agus an t-eun boireann a' gabhail greis mu seach a' suidhe orra airson an cumail blàth. An ceann greis tha na h-iseanan a' nochdadh às na h-uighean.

Tha cailleachagan cheann-ghorm (le faisg air dusan ugh) a' suidhe air na h-uighean airson 2 sheachdain, ach tha iolairean (le 2 ugh mhòr) a' suidhe orra airson faisg air sia seachdainean. Feumaidh na pàrantan an uair sin biadh a thoirt do na h-iseannan gus am fàs iad mòr — 3 seachdainean airson cailleachag cheann-ghorm ach còrr air deich seachdainean airson iolaire.

Tha neadan cuid de dh'eòin mar eòin grunnachaidh, faoileagan agus eòin-fraoich, air an talamh. Cho luath 's a thig na h-iseannan sin às na h-uighean tha iad mòr gu leòr airson ruith air falbh agus falach bho chunnart. Tha deagh bhreug-riochd air uighean nan eòin sin a bhitheas a' neadachadh air an talamh agus tha e doirbh do starrag no sionnach mothachadh dhaibh. Tha eòin eile mar cailleachan-oidhche agus druidean a' neadachadh ann an tuill agus tha na sùilean aca geal no soilleir gorm. An dùil carson a tha seo?

ⓐ Is toigh le eòin a bhitheas a' neadachadh ann an tuill a bhith a' cleachdadh bogsaichean neadachaidh a bhitheas daoine a' dèanamh. Faodaidh tu an ceannach no an dèanamh thu fhèin.

Mas fhìor gur e eun a th' annad, can cailleachag cheann-ghorm. Càit am bu toigh leat do bhogsa a bhith suidhichte? A bheil thu ag iarraidh àite fosgailte no am fàs d' iseannan ro theth air là grianach?

Cuimhnich nach urrainn do dh'eòin uinneag fhosgladh ma tha e ro theth ach 's urrainn dhaibh suidhe air an iseannan airson am blàthachadh ma tha iad fuar. A bheil thu ag iarraidh àite a tha sàbhailte bho chait agus clann chrosda a dh'fhaodadh feuchainn ri d' uighean a ghoid? Am bitheadh tu ga iarraidh faisg air rathad mòr no gàrradh-sgoile anns an robh tòrr fuaim? Sgrìobh tuairisgeul air bogsa-neadachaidh freagarrach.

Is toigh le ialtagan cuideachd a bhith a' cadal ann am bogsaichean fiodha. Tha iad air an dèanamh anns an aon dòigh ach tha iad air an dealbhadh diofraichte. An àite toll cruinn air aghaidh tha sgoltadh anns an làr far am faigh na h-ialtagan a-mach 's a-steach. Cha thuit na h-ialtagan a-mach oir tha iad a' crochadh bun-os-cionn bhon mhullach!

